

[illegible][illegible]

Իսկ մինչ այդ, օգոստոսի 28-ին, վրաց ռուսական սահմանի դադստանյան հատվածում, Վրաստանի տարածք զինված գրոհայինների ներխուժման կապակցությամբ, Վրաստանի նախագահը հանդես եկավ հատուկ հայտարարությամբ: Միխեիլ Սաակաշվիլու խոսքերով, Վրաստանը երբեք թույլ չի տա Հյուսիսային Կովկասում առկա ալեկոծությունը ներկրվի Վրաստան:

«Մեր սարերից այն կողմ ուժեղ ալեկոծություն է, անկարգություն, եւ այդ բացասական միտումը փորձում են տեղափոխել այստեղ, որտեղ շինարարություն է եւ զարգացում: Մենք այսօր գտնվում ենք այլ իրավիճակում, քան 90-ական թվականներին էր, երբ մեր հարեւանին հաջողվեց բռնությունն ու իրարանցումը փոխադրել Վրաստան, ինչը հանգեցրեց Աբխազիայում, Յխինվալիի տարածաշրջանում, Պանկիսի կիրճում հայտնի

իրադարձություններին, ինչին հետևեց քաղաքացիական պատերազմը: Ներկայումս ժամանակն այլ է, եւ մեր պետությունը թույլ չի տա Հյուսիսային Կովկասի անկայունությունը փոխադրվի մեր տարածք», - ընդգծեց նախագահը:



Նրա խոսքերով, օրերս Վրաստանի տարածքում հայտնվել է լավ սպառազինված եւ նախապատրաստված զինված խումբ, որը ձեռնամուխ է եղել պատանդների հափշտակման: «Մենք միջոցներ ձեռնարկեցինք, բանակցություններ վարեցինք ահաբեկիչների հետ, առաջարկեցինք հանձնվել, սակայն մերժում ստացանք: Պատանդների վերջին խմբի հափշտակմանը հաջորդեց հրաձգություն: Արդյունքում՝ ահաբեկիչների մեծ մասը ոչնչացված է, մենք կորցրել ենք երեք մարդ եւ ցանկանում ենք ցավակցություն հայտնել նրանց ընտանիքներին», - նշեց նախագահը:

Նշենք, որ Վրաստան ներխուժած գրոհայինների դեմ երկրի ներքին գործերի, պաշտպանության նախարարության եւ հատուկ նշանակության զորամիավորումների ուժերով, սահմանային Լափանդուրի կիրճում անցկացվեց հատուկ գործողություն: Ուժային կառույցների ջանքերով, գրոհայինների կողմից վերցրած պատանդներն ազատվել էին, փոխհրաձգության ընթացքում զոհվել է 11 գրոհային: Վրացական կողմից հատուկ գործողության արդյունքում զոհվել է երեք եւ վիրավորվել հինգ զինծառայող: Գրոհայինների վերացման գործողությունները գլխավորում էր հատուկ կազմավորված շտաբը՝ երկրի վարչապետ Վանո Մերաբիշվիլու գլխավորությամբ: